

## La fonzion del Santo Ciod

El sò de settember ancamò cald  
la strada piena de gent,  
vola per l'aria giò dal campanin  
on concert de campann,  
d'on coo all'alter de la contrada  
lè tutta ona parada de sandelin.

In Sant Giovan tutt luss e parament  
l'altar el sberlusiss d'or e d'argent,  
on alabardee impalaa su l'ultim basel.  
La cantoria in su l'orghen  
la tira foeu tutt el fiaa  
la gent la se calca fin dent i cappell.

Foeura, ona scies de gent  
da on'ora l'ha ciapaa posizion  
sui marciapè, adree ai cà.  
«Ecco che vegnen» man man cor la vos  
tucc slonghen el col, se alzen sui pè,  
i bagaj scapen de man per vedè.

Fann el pass quatter alabardee  
con l'alabarda in spalla  
e ona banda in divisa de galla.  
Vegn giò da l'Arengari  
ona filada de fioeu  
col pret che dis el Rosari.



Col stendard de la Madonna i tosann  
passen col vel bianc in testa,  
con la candela in mann  
i donn vestii de la festa  
e coi ciloster e el Cróson  
i scolar de la scoeula del Dom.

E tanti angiolitt adree a lor:  
i tosanett e i fiolitt  
de la Prima Comunion.  
Do' porten on cavagnoeu pien de fior  
che somenen man man per terra  
per fa strada al Ciod del Signor.

Con ona marcia in sordina  
on'altra banda la sfilà pian pian  
intant che sponta  
el balduchin de lontan.  
Passa ona fila de seminaristi,  
ona fila de fraa e vunna de monig,

passen tutt i pret di parocchi  
e i canonich del Dom  
in cappa magna e ermelin.  
Quatter ceregh con la cotta bianca  
porten la Crus, el turibol, l'incens  
e l'acqua santa in del sidelin.

Sotta al balduchin tutt d'or  
passa la Crus col Ciod del Signor;  
I donn col fazolet in testa,  
i fioeu in genogion,  
i omen col cappel in man  
se segnen con devozion.

Tucc resten on moment incantaa  
poeu se moeven pian pian  
coi comment de la festa:  
han vist la tosa o el bagaj,  
la visina de cà o la miee  
e vann a cà tucc content.

Adess la strada l'è voeuja;  
in alt i sandelin  
sgarissen al sò de mez dì,  
in terra i fior di tosann  
e i gott di mocol di donn.  
Se sent ona banda che sonna lontan.

Giuseppe Crespi